

# Ancunter alla festa da Pasca

Brev pastorala per igl Sacramaint dalla panatienztga

da

Msgr. Dr. Vitus Huonder

uestg da Coira

Frars e soras aint Cristus

Igl taimp da Curesma ans magna *vers la festa da Pasca*. El è en taimp dalla meditaziun e dalla contemplaziun digl noss spindramaint, digl piteir e mureir digl noss Signer Jesus Cristus; en taimp d'uraziun e da gronda legreia spirituala. Nous nign danovamaintg consciaints dalla retgezza dalla nossa cardientscha ed evenimentagn la buntad da Dia e sia careztga vers nous carstgangs<sup>1</sup>. Nous scurvign an connex cun l'*amprema lecziun* da chella amprega dumengia da Curesma igl artg, tgi Dia, igl noss Signer, ò tandia ainten igls neivels siva igl diluvi<sup>2</sup>, per fundar ena leia cugl carstgang. Chel segn d'affecziun divina ans vign confirmo aint igl Fegl da Dia, Jesus Cristus. Percheigl tgi antras la Nova Leia è el sa liia cun nous an perpeten.

Il segn dalla Nova Leia ans è nia imprimia antras igl sontg Batten, digl qual nous santign ainten la *sagonda lecziun*, an spezial cun igls plets: Igl è "... igl Batten tgi az spendra ossa. Chegl serva betg per lavar igl corp digl tschuf, ma è pitost ena supplica tar Dia per aveir ena buna cunsienztga sen fundamaint dalla restizanza da Jesus Cristus"<sup>3</sup>. Antras l'ava ed igl Son Spiert ischans naschias aint il Batten per la veta cun Dia. Nous ischans anseros ainten Cristus, munias cun la graztga divina, recepias ainten la cuminanza digls sontgns e rinfurzos antras il Sacrament dalla Cresma per dar perdetga dalla nossa cardientscha. Uscheia ischans dotos per ena veta an

---

<sup>1</sup> Tit 3,4

<sup>2</sup> Gen 9,13

<sup>3</sup> 1 Pd 3,21

sontgadat e dastgagn evenimentar, scu chegl tgi igl psalm dei, tgi igl Signer seia bung e gist <sup>4</sup>.

Er igl *evangeli* ans commova a legreia interna ed a ferma speranza, percheigl tgi el mossa, tgi igl noss Signer vegia sfratgea la pussanza digl Satan ed ans regalo la cumplaneida digl taimp, en igl qual nous savagn veiver en graztga cumplagna. Lainsa suandar mintga de agl sies clom: “Mide igl voss patartger e carte ainten la Buna Nova”<sup>5</sup>.

Tschert, schizont scu battegeas e cresmos savainsa disdeir e crudar aint igl putgea. Bagsavond da chella misergia, ans ò igl Signer regalo igl *Sacramaint dalla panatienztga*. Scu tgi igl evangelist son Gion rapporta, ò el do la seira da Pasca la pussanza agls apostels da perdunar igls putgeas cun igls suandonts pleds: “Ratschave igl Son Spiert. A chels tgi vous piglez davent igls putgeas, ènigl piglias davent ad els. A chels tgi vous retignez, ènigl retignias”<sup>6</sup>. Gea, igl Sacramaint dalla panatienztga è en sacramaint pascal, en sacramaint, tgi monta restianza ed e veta cumplagna.

Percheigl sa mossigl, tgi igl Sacramaint dalla panatienztga è en *grond ageid per nossa veta*. Ia consaint, tgi chegl n’è betg adegna nia annunztgia e tgapia aint igl passo an chegl senn. Percheigl sto chegl dung divin deliberond e spindront an bliers cass danovamaintg gnia rescurveia. Agls plevants e collaborateurs pastorals sung ia percheigl angraztgevel, schi els explitgeschan da nov e cun nov schlantsch la dutregna dalla Basalgia pertutgont chel sacramaint, per tg’igls cartaints amprenan

---

<sup>4</sup> Ps 24 (25),8

<sup>5</sup> Mc 1,23. Scu tgi Jesus è nia mano an malampruamaint, uscheia nignsa er nous mess sen la prova aint igl noss travagl da mintga de. Jesus ò victoriso. Schi nous igl suandagn ed confidagn agls sies sacramaints, savainsa er nous mitschier dalla noschadad digl Satan.

<sup>6</sup> Gion 20,22-23. “Il Signer restizzuo ò institua chest sacramaint, cura tgi el è cumparia la seira da Pasca agls sies apostels schond: ‘Ratschave igl Son Spiert. A chels tgi perdunez igls putgeas ènigl perdunos; a chels tgi vous igls retignez, ènigls retignias’ (Gion 20,22-23).” Catechissem dalla Basalgia Catolica. Cumpendi, Minca 2005, Nr. 298.

a conoscher adegna migler la sia impurtanza per lour veta e survignan cotras en nov access lotiers.

Scu mintga sacramaint regala er igl Sacramaint dalla panatienztga la *graztga*, damai igl dung da veta surnaturala, da veta divina. Fitg custevel da chest sacramaint è igl *confess persunal* digls agens putgeas. El na dastga betg angal neir considero scu ena preteisa per obtigneir l'absoluziun. La confessiun digls noss putgeas è en act tgi ans liberescha internamaintg e tgi ans derva per igl perdung antras Dia e sustigna essenzialmaintg la guariziun digl spiert e dall'orma. Dantant tgi chel tgi peglia panatienztga examinescha profundamaintg sia cunsienztga, s'anricla digls sies putgeas, igls confessa agl spiritual, retscheva l'absoluziun ed è pront da metter an urden igl malfatg<sup>7</sup>, sa cumplanescha igl process dalla conversiun digl spiert e dall'orma, dalla quala sorta nova veta, uscheia tgi er cò vala igl pled digl Signer: “La tia cardientscha at ò spindro”<sup>8</sup>.

La *confessiun persunala* davant igl spiritual e *l'absoluziun* sa refereschan l'egn a l'oter e furman en'unitad. En'absoluziun generala sainza en confess persunal dastga perchelg neir dada angal an cass da prievevel da mort imminent, damai ainten ena situaziun, noua tg'igl cartaint disponia da prender panatienztga na so betg confessar igls sies putgeas perveia da spezialas cundiziuns externas<sup>9</sup>. Schizont an chel cass

---

<sup>7</sup> Cump. Cumpendi Nr. 302-303

<sup>8</sup> Mt 9,22 ed an differents ulteriours lis digls evangelis.

<sup>9</sup> Cump. la notificaziun digls 1 da schaner 2009 dalla Conferenza Episcopala Svizzera “Revisiun dallas normas particularas dalla Conferenza Episcopala Svizzera pertutgont igl nov dretg ecclesiastic (seria VI). Decret pertutgont can. 961 CIC”. Cump. lotiers mia brev agls spirituals digl december 2007: “La davosa geda è Papa Gion Pol II. s'externo aint igl Motu proprio ‘Misericordia Dei’ digls 7 d’ avregl 2002 pertutgont chella dumonda. El renda attent aint igl sies screiver, tgi la decisiun, schi ena absoluziun generala seia giustifitgeida, na seia betg tgossa digl bab spiritual, mabagn digl uestg diocesan. Scu uestg diocesan considerescha las premissas, tgi vignan ventiladas aint igl CIC, can 961, § 1 e 2, per betg dadas, perchelg tgi persungas tgi vottan piglier panatienztga ainten las nossas relaziuns èn bungas da cattar en bab spiritual a taimp util. Perchegh supplitgescha tot igls plevants, da sa mussar scu fidevels administratours digl sacramaint dalla panatienztga e dad exequeir correctamaintg las devoziuns da panatienztga.”

pretenda la relaziun interna da confessiun persunala ed absoluziun, tgi per la valevladad dall'absoluziun vigna la confessiun pigleida siva, pispert tgi chegl è pussebel<sup>10</sup>.

La valeta dallas schinumadas *devoziuns da panatienztga*, recumandadas dalla Baselia, consista ainten chegl tgi ellas geidan agls cartaints da perscrutar la cunsienztga, da s'anriclar digls putgeas e da ruier Dia per perdung. Pero na dastgigl betg neir confundadas cun igl Sacramaint dalla panatienztga. La devoziun da panatienztga è ena reflexiun ed ena supplica a Dia per perdung. Igl sacramaint pero, tgi resta colliia da prancepi cun igl confess persunal da colpa digl penitent, è *an vertet dall'absoluziun digl spiritual* dung digl perdunamaint da Dia e dalla grazzta sacramentala.

Frars e soras ainten Cristus, ia az less ancurascher d'acceptar danovamaintg chel sacramaint da speranza, da liberaziun e da legreia spirituala<sup>11</sup>. Agls spirituals sunga angraztgevel, schi els stattan venavant e anc pi savens an disposiziun digls cartaints per dar panatienztga. Indispensabla è er *en'introducziun digls unffans aint igl Sacramaint dalla panatienztga* fatga cun tot chito e tgi corresponda a lur vigliadetna. Uscheia vign l'amprema panatienztga a succeder avant l'amprema sontga Communiun ed esser in pass impurtant per retschever igl Signer aint igl Sontgissim Sacramaint. Gea, la panatienztga è la miglra preparaziun per la sontga Communiun<sup>12</sup>.

---

<sup>10</sup> Chegl fiss er sto basignevel cun la practica digls davos onns, chegl tgi è nia exprimia cotras, tgi dallas ordinaziuns dalla Baselia anor è adegna nia punctuo, tgi siva digl retschavimaint dall'absoluziun generala stoptgan igls putgeas grevs neir confessos. Ia sung pertschert, tgi chegl n'è betg succedia an bliers cass. A madem taimp ègl pero da parteir dalla situaziun tg'igls cartaints vegian agea an buna cretta, uscheia tgi nous savagn metter igl passo plagn fidanza aint igls mangs buntadevels da Dia.

<sup>11</sup> Per s'approfondar aint igl Sacramaint dalla panatienztga e reconciliaziun sa recumonda igl Catechissem dalla Baselia Catolica, Minca 2003, Nr.1422-1498.

<sup>12</sup> Cump. la brev pastorala da Curesma 2008: Igl sontg Corp digl Signer.

Gist aint igl Sacramaint dalla panatienzta i sa verifitgescha chegl tgi stat ainten l'expressiun digl nom "Jesus", tgi vot gea deir "Spindrader". Propi, el, igl noss Signer, è igl noss Spindrader e Salvader. El ans surlascha betg alla pussanza digl Nosch, na, el ans accumpogna *en'antiera veta* cun chel sacramaint e renovescha schi savens scu chegl tgi nous igl supplitgagn ainten la panatienzta igls dungs da graztga digl sontg Batten e dalla sontga Cresma. An verdad, igl Sacramaint dalla panatienzta è en regal, antras igl qual nous restagn spiritualmaintg sangs u tgi nous la cuntanschagn danovamaintg. El ans mossa, scu tg'igl noss saleit schea a cor a Cristus. Igl è propi en sacramaint psacal, e perche gl er en sacramaint tgi ans paregia per la festa dalla restizanza digl noss Signer er per ans manar alla festa da Pasca.

*Ans viglia l'intercessiun dalla mamma da Dia, tar la quala nous clamagn scu "refugi digls putgants" e "gidantra digls cristifideivels" accumpigner sen la veia digl taimp da panatienzta e contanscher per nous la graztga d'ena sontga veta.*

Cun chel giaveisch e cun l'ampurmischung dalla mia uraziun az saleidel cordialmaintg ansemen cun la mia benedicziun episcopala. Dia az mantigna an sia graztga.

Igl vos uestg

✠ Vitus